

東
華
續
錄

東華續錄

咸豐七十一

臣王先謙敬編

臣陶澐宣恭校

閏五月辛巳朔予貴州死事知縣邱樹桐等江西殉難在籍翰林院庶吉士徐鵬等祭葬世職○胡林翼奏皖賊分竄黃梅經江南將軍都興阿剿敗自是賊營移平就險移小併大意在堅守伺隙五月初五日後賊由大河鋪迤北依山增壘三座十二日賊全數擁出攻撲孔廣順等營並攻黃梅縣城都興阿在陸家背聞信卽派多隆阿調齊馬步隊分赴援應時賊正攻撲孔廣順各營我軍堅壁不動賊近以礮轟之多隆阿分兩路進攻賊於要路排槍抗拒鏖戰多時賊又四面撲出參領西林布杜嘎爾等由迤西山坡衝入賊眾披靡我軍追二三里而返計殪賊二百餘名兵勇亦聞

有傷亡其六安霍山之賊自我軍克復英山後日思上竄安徽藩
司李孟羣以援皖之師駐紮羅田境上蘄州張家塆之賊則知府
邢高魁統興國防兵並由省調往之義寶虎三營合九江調援之
仁營駐於劉家河以超平二營合署蘄州知州彭應鯉並羅田團
勇駐分路街互相策應五月初四日李孟羣派知府朱啟仁等合
彭應鯉擊張家塆之賊於分路街勝之初十日賊撲獅子口彭應
鯉朱啟仁分三路進並會馬隊由劉公河夾擊又勝之賊退踞望
天畝青石嶺等處初七八等日賊大出擄掠張得勝會合團勇在
黃牛衝擊敗後復渡河分剿敗退之賊沿途爲英羅團勇所截張
得勝奮追斃賊無算初八日晚駐於英山界初九日張得勝等仍
率團勇兜剿該逆列隊山頭相持四時之久守備陳炳南策馬斬
大旗賊一名眾軍齊進賊大潰東竄太湖共計斃賊千餘名擒斬

百數十名初十日張家塋之賊犯分路街參將趙鴻舉策馬渡橋
都司盧又熊等分左右齊進彭應鯉率斬羅之勇衝擊追至胡家
涼亭斃賊無算十四日探知黃梅大股之賊欲撲獅子口我軍兩
路迎擊斃賊五百餘名殺僞檢點七名僞指揮十名賊眾敗潰追
斬六千餘級超平二營乘勝攻入盧又熊繼進破賊三卡賊忽分
股來鈔都司段清平揮刀直前適我軍馬隊繼至賊仍回望天畝
堅守不出臣查楚皖兩省之交東則太湖宿松北則英山霍山六
安山路紛歧防不勝防賊之分路四至竇欲牽掣我軍使我軍不
能兼顧彼乃乘隙而入直窺武漢臣於北岸厚集兵力而尤慮毗
連江西之崇陽通城興國大冶乘我空虛狼奔豕突見在副都統
巴揚阿舒保馬隊先後齊抵蘄州臣更調道員唐訓方一軍合力
攻剿並可遙扼興治似於防備更爲周密黃梅大河鋪雙城驛一

帶賊營蜿蜒二三十里張家塆之賊又退踞雙城驛另抽大股橫竄黃梅廣濟賊情狡譎已飛飭各軍分路進剿務期肅清邊界使李孟羣援皖之師無虞梗阻而李續賓之軍得專意下游力圖潯郡報聞○壬午諭內閣袁甲三奏攻破王圩賊巢疊獲全勝一摺亳州捻匪踞守王圩與姚鄧兩圩互相犄角抗拒官兵經袁甲三督兵圍攻環築礮臺晝夜轟擊每日擊斃賊數十人及百餘人不等並於本月十五十八等日將王姚兩圩出壘割麥之賊殲擒五百餘名其附近鄧圩之鄧家莊丁家莊爲賊藏麥之所亦經官兵燒毀村內伏賊悉被殲除並將姚圩附近麥垛一律焚燒二十一日復乘風向王圩施放火箭延燒房屋並將救火賊匪轟斃百餘名二十二日官兵復逼近圩根拋擲火彈火包被脅難民同時逃出圩內匪夥李和尚等乘機放火爲官兵內應兵勇一擁而入立

將王圩攻破除燒斃淹斃砍殺外生擒賊匪王大有等四十三人
奪獲槍礮硝磺器械不計其數剿辦尙屬得手著卽乘此聲威將
姚鄧兩圩賊巢迅速掃除毋畱餘孽所有此次攻破王圩賊巢出
力之員弁兵勇准其擇尤保奏候朕施恩○諭軍機大臣等李鈞
奏請暫行招商販運米煤接濟省城等語河南省城所需糧食煤
斤向恃各路水運自粵匪竄擾後船隻概行封禁日用缺乏商民
坐困該河督所請暫行招商通舟販運自爲亟籌民食起見著准
其暫行變通以資接濟惟通舟處所止准至省城爲止不得逐漸
鬆懈駛往下游該河督仍當嚴飭兩岸委員會同沿河各州縣帶
領團練兵勇常川巡察不准奸民濶迹如南路有警立即將各船
收集上游仍行封禁或竟鑿沈以免偷渡總期便民防河兩無妨
礙將此諭令知之○諭扎拉芬奏奏庫車回匪滋事曉諭解散首

逆就擒等語庫車回子聚眾滋擾經烏爾清阿曉諭良回散其黨
與飭帶鄉勇回兵前往剿捕業將首逆數名擒獲餘黨漸即解散
所有調赴喀什噶爾換防官兵二百餘員名著即飭令前赴防所
各城回眾近尙安謐何以庫車之素比提等莊斗然滋事著俟該
委員等查明啟釁根由卽據實具奏並著妥爲安輯毋令再滋事
端將此諭令知之○命前貴州布政使文謙赴直隸交署總督譚
廷襄差委○癸未署兩江總督何桂清奏金陵爲賊首老巢盤踞
數年根深蒂固非先斷長江接濟而從鎮江句容太平三路進兵
斷難制其死命見在賊之精銳聚於句容城小而堅最不易拔惟
溧水克復大局更有轉機鎮江賊勢亦頗衰微臣親赴京峴山察
知城中止首逆吳如哮堅守其被脅逃出者接踵今溧水之捷賊
膽益寒宜併力以圖句容旣復再圖鎮江鎮城一破瓜州賊難久

踞其不急攻金陵者以上下游皆爲賊守我攻其東則上游之賊應之我攻其西則下游之賊應之故雖得鎮江不得太平而金陵猶不能破也蕪湖又爲太平之上游長江之鎖鑰我與賊所必爭當甯國克復其不能徑取蕪湖者以溧水未復後路可虞恐賊由定埠梅渚等處一走東壩一犯建平耳今幸溧水已平擬分兵紮博望鎮東壩之兵進紮固城鎮宣城之兵進紮老鴉山固城博望俱可直取太平關太平城內守賊無多取之甚易至老鴉山一路尤爲內保宣城外取蕪湖扼要之地亦可會同吳全美等水師肅清江面斷賊往來傳聞石達開由銅井渡江逃往江北洪逆合蒙賊禾賊追之禾賊亦乘勢逃去足見該逆自相殘害眾叛親離駢首受誅自不在遠臣惟有竭力運籌接濟軍餉俾得馬騰士飽早奏膚功○上諭軍機大臣等何桂清所奏通籌全局剴切詳明具

見爲國丹忱不負委任江南財賦錢漕正供而外惟上海一關堪充軍餉自廣東英夷滋擾夷貨不通大半聚於上海徵收關稅自應較前倍旺若如所奏原議月撥餉銀二十萬見止十四萬兩儻非經理不善卽係隱匿侵漁署蘇松太道藍蔚雯由同知在滬多年朕聞其遇事把持視海關爲利藪一切公事不令他人豫謀該處小口甚多私販出入稅課偷漏殆不可問該員係實任揚州知府何必令其久署斯缺轉將實授之湯雲松展轉委署卽或湯雲松人地生疏難勝此缺蘇省豈無勝任之員可以接署難保非營求而得況關稅旣不加充安知非盡飽私橐耶至捐輸一節借資民力必宜先服民心朕聞蘇州府城三縣捐輸已及四次而江震常昭崑新等屬皆止一次甚有一次書捐尙未繳出者松江太倉常州捐數亦屬寥寥似此多寡不同必致推諉觀望旣係分府勸

捐則各屬皆宜遴選正人豈可令射利之徒廁身其閒包庇侵漁弊端百出該署督所稱隱漏大戶有人把持誠所不免以朕所聞在籍中允馮桂芬辦理勸捐多有徇庇其親戚富戶之在吳江太湖廳等處者率多隱匿該員家本寒素自勸捐之後置買田產建蓋房屋頓成富家其中情弊尤不可問一人如此從而效尤者當更不少若不從嚴究辦何以帖服人心著何桂清嚴密訪查據實參處以儆其餘並各飭地方官遴選公正紳耆承辦勸捐以免偏枯而除積弊至海運漕糧爲天庾正供京師缺米情形如此緊急萬不得已而截畱充餉州縣旣以賤價出售何不照部定章程銀米並放而必盡放銀兩復以重價買米一出一入之閒傷耗甚多是否彼時因糧臺不肯收米必欲得銀所致抑係地方官藉以侵吞入己並著查明從重嚴參畱浙之雲南糧道王有齡該署督旣

知其實能得力著准其調赴江蘇與之商議先以整頓上海稅務爲第一要著如果實有把握奏聞後再降諭旨前因藩司何俊年老恐不勝任諭令該督撫查參仍著何桂清趙德轍查明參奏並先將藍蔚雯撤回揚州本任另行派員署理上海道印務另片奏溧水克復統籌進剿事宜並石逆逃往江北等語已諭和春等妥速布置並諭德興阿福濟等防範江北矣將此由六百里諭令知之○諭何桂清奏通籌江南近日剿辦情形等語據稱金陵賊匪精銳聚於句容城小而堅最不易拔探聞五月二十三日克復溧水大局幸有轉機鎮江老賊不過數十人其被脅逃出者接踵今溧水大捷賊膽益寒宜乘此聲勢併力進取句容鎮江擬將溧水之兵分紮博望鎮東壩之兵進紮固城鎮宣城之兵進紮老鴉山並會同吳全美等水師肅清江面斷賊往來則金陵一城自成孤

注又聞五月十一日逆首石達開由銅井渡江逃往江北洪逆令
蒙賊禾賊追之禾賊亦乘勢逃去逆匪既生內訌機會更不可失
鎮江賊勢甚微或先取鎮江後圖句容亦得古人攻瑕之意而上
游太平蕪湖一帶必須分兵斷其援應方能兩路夾攻直擣金陵
著該大臣等將何桂清所奏各情妥籌辦理前據福濟奏提督秦
定三於四月二十七日由臨淮帶兵啟程在廬州支銀三千兩至
梁縣支銀七千一百兩抵臨淮後截留米六百石合銀六千兩在
定遠縣截留山東餉銀二千兩在五河縣截陝西餉銀一萬四千
兩一月有餘共用餉銀三萬餘兩見值餉需支絀豈容任意浮支
著該大臣等查覈銀數除應行支領外所有浮支銀米卽於該營
兵餉內按數坐扣以杜冒濫並著察看秦定三如果年力就衰不
能約束兵勇卽行據實參奏將此由六百里諭令知之○諭本日

據何桂清奏傳聞五月十一日逆首石達開由銅井渡江逃往江北洪逆令蒙賊禾賊追之禾賊亦乘勢逃去各等語石達開係著名劇賊此時不踞金陵逃往江北足見羣賊內訌眾叛親離惟石賊素稱驍悍兼多詭詐此時逃往江北必係不附洪逆意欲自成一隊見在江浦未復霍六桐城安慶太平一帶徧地賊蹤儻該逆裹脅賊黨乘閒北竄不可不防著德興阿翁同書福濟偵探石達開逃往何處卽以重兵扼剿杜其北竄之路或設法離閒設計誘擒使逆渠投首餘賊聞風畏懼不難以次掃蕩將此由六百里各諭令知之○江西巡撫耆齡奏報到任日期得旨聞汝在南贛一帶頗著聲威擢升藩司亦稱有爲今旣身任疆圻尤應深顧大局勿墜前聲力圖振作○甲申諭內閣前據王懿德奏逆匪竄入福建邵武光澤等處城池相繼失守督糧道王訓等力竭被害業經

降旨議卹此外失守各員尙未查明下落難保無先期逃避情事
地方文武均有守土之責若聞警輒逃何以爲斯民禦災捍患偷
生無恥實堪痛恨著王懿德查明被擾地方如有先期逃避者卽
著以軍法從事毋稍姑容再自用兵以來各省殉難人員經統兵
大臣及各督撫奏請獎卹者無不立沛恩施該員等見危授命大
節凜然急應隨時查辦乃近來多有外省漏未請卹致各員家屬
紛紛呈請者非所以慰忠魂嗣後遇有捐軀盡節人員著各路統
兵大臣並各督撫等迅速查明請卹毋稍稽延○諭和春等奏官
軍克復溧水縣城一摺五月十四等日逆賊竄至郎山偷築營壘
經總兵傅振邦督同李志和等帶領馬步隊分攻截擊尖山又出
賊匪橫衝經周天培等伏兵痛剿毀平賊營八座援賊復在博望
湯村築壘焚掠我軍追殺奪獲賊壘數十座直逼城下傅振邦等

往來調度連拋火罐西南門外賊營火起驚亂虎坤元等奮勇先
登北西二門同時分兵追擊逆匪自相踐踏餘賊由東北門衝突
逃出經弁兵轟斃共約六千餘名生擒三百餘名內有偽副丞相
高姓等二十餘名訊明正法逆匪自上年五月竄踞溧水縣城賊
援麇至經傅振邦等督率員弁兵勇奮力剿擊先後斃賊不下二
萬有奇該逆勢已窮蹙克復堅城殲除羣醜洵足以寒賊膽而快
人心傅振邦等盡心籌畫剿辦有方實屬謀勇兼優著和春等查
明在事出力人員一併保奏候朕施恩○予江甯殉難副將伍郎
阿等祭葬世職○乙酉會國藩奏臣疊奉溫諭仰見我皇上俯
鑒臣子之隱曲示矜憐不棄驚下之才曲加器使凡屬旁觀猶爲
感泣矧在身受能無奮興惟臣之下情有不敢不瀝陳於聖主
之前者臣通籍時祖父母父母皆無恙在京十四年在軍五年堂

上四人先後見背生前未伸一日之養歿後又不克守三年之制寸心愧負實爲難安前代及我朝奪情之舉被人彈劾者層見疊出而兩次奪情則從古所無臣到籍以來展轉思維欲終制則無以報吾君高厚生成之德欲奪情則無以報吾親恩勤鞠育之懷欲再出從軍則無以謝後世之清議欲不出則無以謝患難相從之軍士進退狼狽不知所裁查近日軍務皇上潛移默運實

已挽回十分之七八以大局言之河北蕩平洪楊內亂武漢肅清水師精勁迥非咸豐二三年氣象可比以江西言之西路克復十餘州縣潯瑞吉臨皆駐重兵亦迥非上年春夏情形可比自臣出營而後又聞瑞州長濠日固臨江四面合圍吉安賊船焚燒一空東路貴溪屢獲大捷江西軍事漸有起色將軍巡撫兩臣辦理裕如添臣一人未必有益少臣一人不見其損臣假期將滿葬事未

畢合無籲懇 天恩援照上年賈楨終制之例准臣在籍終制感

激鴻慈永無既極 上諭內閣會國藩本以母憂守制在籍奉諭

幫辦團練當賊氛肆擾皖鄂卽能統帶湖南船勇墨經從戎數載
以來戰功懋著忠誠耿耿朝野皆知伊父曾麟書因聞水師偶挫
又令伊子曾國華帶勇遠來援應尤屬一門忠義朕心實深嘉尙
今該侍郎以假期將滿陳請終制並援上年賈楨奏請終制蒙允
之例覽其情詞懇切原屬人子不得已之苦心惟見在江西軍務
未竣該侍郎所帶楚軍素聽指揮當茲勦賊喫緊亟應假滿回營
力圖報效曾國藩身膺督兵重任更非賈楨可比著仍遵前旨假
滿後卽赴江西督辦軍務並署理兵部侍郎以資統率俟九江克
復江面肅清朕必賞假令其回籍營葬俾得忠孝兩全毫無餘憾
該侍郎殫心事主卽以善承伊父教忠報國之誠當爲天下後世

所共諒也○丙戌英桂勝保奏官軍攻克方家集後逆匪竄驛王家壩欲與三河尖老巢相爲犄角圖拒我師五月二十日臣勝保派穆騰阿管帶馬隊官兵分兩路齊進直薄王家壩賊壘該逆初猶併力死拒迨火箭射入延燒草房逆眾驚亂撲河而逃我兵趁勢鈔擊殲斃無數其撲過河岸者又經馬隊截殺殆盡二十一日龔張各逆率黨四五千名直撲營盤臣勝保揮令馬隊向前衝殺並於橋口施放火箭立斃賊眾五六百名追至三河尖老巢始行收隊二十二三四等日乘勝督兵進攻將小曹集童家樓劉家店柳家溝口各壘一律平毀擒斬四五百名六七百名不等其賊船順流東駛者經署固始縣知縣張曜等督率兵勇由淮河南岸截剿擒斬二百餘名奪獲賊船十一隻餘匪向東奔竄該縣等沿河追殺生擒張麻孜等一百餘名其三河尖東北六十里鋪一路爲

該逆回竄雒河要道屯聚死黨悍賊尤眾我兵連日進攻南路密
派馬隊分往東北直前掩殺該逆不料我兵驟至倉皇出拒潰散
不支計殲斃不下五六百名逆眾陸續潰散二十五日豫挑善識
水性兵勇數百名晝水潛渡南岸繞越北面乘暗越圍而上噴筒
火彈拋入賊壘該逆驚亂自相踐踏我兵一齊撲入逆眾相率狂
奔臣勝保一面飛飭兵勇先將河中船隻焚燒並奪小舟駕至對
岸接應後隊官兵陸續過河接殺餘匪立將三河尖老巢克復救
出老幼難民千餘人一面飭令馬隊跟蹤追剿賊奔三河尖迤東
之南照集地方該處本有賊巢情急擁眾竄入我兵接踵而至剿
斃四五百名餘賊齊撲河中晝水爭渡淹斃及中槍箭死者浮屍
蔽河而下餘賊齊上南岸奔逃見飛飭署廣鳳道金光飭在正陽
關一帶迎頭截擊臣勝保督兵進剿臣英桂亦卽移營前進接應

後路總期早殄羣兇不畱餘孽在事員弁兵勇可否仰懇恩施擇
尤保奏 上諭內閣官軍自攻克方家集後逆眾復竄踞王家壩
與三河尖匪巢犄角抗拒經勝保督兵乘勝進攻將附近三河尖
之小曹集童家樓劉家店柳家溝口各賊壘一律平毀並將三河
尖老巢克復兩旬之間疊獲大勝阜陽一帶賊巢漸次肅清勝保
剿辦捻匪所向克捷著賞還花翎以示獎勵其在事出力員弁兵
勇著英桂等擇尤保奏候朕施恩○諭軍機大臣等王慶雲奏酌
擬續勸捐輸一摺山西省京協各餉撥解浩繁該省庫款益形支
絀自應寬爲籌備以資接濟山西省民風敦厚好義急公自軍興
以來捐輸軍餉頗形踴躍一經奏到朕卽立沛恩施以資觀感茲
據該撫奏稱平陽府及絳州忻州等處紳民人等皆深知大義卽
可妥爲諭勸捐借並行其已捐之太原汾州二府所屬尙不乏急

公報效之人亦著一併勸令輸將次第保奏該撫務當揀派妥員會同該地方官及公正紳士悉照舊章辦理毋得假手吏胥抑勒苛求致滋流弊將此諭令知之○丁亥官文胡林翼奏查李續賓於九江城外開濬長濠自官牌峽迤南而東至白水湖尾計長三十餘里踰山脊四重畱東門大路爲誘戰追襲之地濠深二丈寬三丈五尺復慮及上游陸家背轉運賊可越琵琶亭而截我糧路其東達梅家洲湖口縣姑塘等處亂山層疊路曲峯回尤易伏賊乃於要隘安置大礮並多發偵探晝夜梭巡二月初九日掘濠及東面城賊忽出四千餘人西面之新壩亦出賊二千餘李續賓禁諸營勿出隊自率馬步繞出八里坡後岡又設伏於馬宿嶺約聞坡後礮聲悉力奮擊計逾兩時賊漸偪近各軍聞礮聲齊出斬三百餘級又追殺七百餘名其西面之賊亦經水陸各軍轟斃五百

餘名初十日賊復出三四千於八里坡西壩亦出賊二三千另伏賊於坡後茶菴李續賓令南路西路諸營出戰令東路勿遽出自率馬步繞譚家畝楊樹背等處先敗其伏仍飭蹲伏以待南路之賊初不知其伏之已敗也且戰且走甫至坡後伏勇突起東路營亦同時撲出賊大敗狂竄回城西路之賊亦敗四路共斃賊千餘名我軍陣亡藍翎千總毛丁山藍翎把總盧久盛外委陳德林三員十五日探知安慶來援賊七八千人城賊大出約二萬人我軍首尾迎擊馬隊從中衝出殪其前鋒二十餘名賊不少卻水師從甘棠湖直繞城下轟東路之賊官牌峽諸營於湖坪夾擊西路之賊遂收復沿湖助擊東南諸營乘勢衝突賊首尾不能相顧悉眾狂竄諸營尾追及城下礮子如雨其由城南縫入者我兵以連環槍轟之水師復以大礮闌擊無得脫者其斃賊五千餘名傷者無

數我軍陣亡藍翎守備陳得華藍翎把總陳文勝外委陳光玉蕭有貴四員自是三月之久賊伏不出而南岸長濠且告竣矣四月初間皖賊數萬人號稱十萬分犯蘄州羅田黃梅邊界江甯將軍都興阿移師分剿李續賓亦卽分兵渡江駐陸家背又分軍上援蘄州於是城賊乃逐日出抗憑濠施放槍礮我軍禦之互有傷亡李續賓因勻各營憑濠分守而自移湘右營駐賽旗嶺並增募勇丁一千人駐嶺之左右聯絡諸營以扼其要其渡江援守之仁營亦增募四百人以厚其力五月初十日賊眾大出以悍者踰濠來撲我營李續賓令諸軍勿遽出戰俟賊過濠及半以新習之馬隊衝之賊又大敗奪路反奔挫斬甚眾是日首逆林啟榮親出督陣我軍斃其僞檢點指揮各一名蓋賊以分軍渡江竟敢乘虛來犯也總兵楊載福以皖賊分竄楚邊黃州各屬皆濱江州縣因抽分

水師礮船由九江上至蘄州擇要停泊並飭副將李成謀等移紮官牌峽港內與副將朱品隆水陸相依五月初二日楊載福自至蘄州是日官牌峽水師見賊船數十號上駛李成謀等卽時出隊賊分兩路敗竄李成謀從新河追之易景照從老河追之會於湖口而湖口賊船三百餘號由梅家洲兩岸鈔出又另股從扁擔峽包我軍船之後其時西南風大起李成謀以長龍船抵扁擔峽之賊自以三板乘風縱擊賊敗入湖口李成謀不知深入賊巢距本營已百餘里及回至扁擔峽而湖口賊船復出尾追扁擔峽賊船又沿南岸繞出我前李成謀溯流上至小池口城賊復槍礮齊發我軍逆風逆水舟行不速被賊毀沈長龍五號三板十三號追上游來援事已無及初三日楊載福聞信回營親督水師巡江賊揚帆直拒李成謀衝入奪回三板四隻擊沈賊船無數

臣

查九江城

賊蟄伏不出我軍肉薄攻堅終難得手必須長圍坐困乃可永斷
接濟惟李續賓原統不過萬人尙闕其東北一路未能合圍近以
北岸邊界警報日至又分去四千人渡江協剿必俟北岸肅清乃
可專意潯陽此次李成謀孤軍深入致有挫失尙於全軍無損楊
載福先期上巡蘄州相離太遠可否邀免處分出自逾格 天恩
陣亡之守備陳得華等應請從優議卹 上諭內閣官軍偪攻九
江賊匪經李續賓掘濠設伏屢獲勝仗水師以深入致挫旋復獲
勝總兵楊載福副將李成謀均著免其議處所有陣亡之守備陳
得華等著交部從優議卹○官文胡林翼奏北岸之賊目爲陳玉
城李秀城勾結皖捻饑民號稱十萬自四月以來由宿松太湖英
山霍山分犯蘄州黃梅廣濟羅田邊界實亦不下六七萬人其黃
梅一路經將軍都興阿等疊次剿辦連破賊壘七處殺賊三千餘

人而依險結寨之賊營尙多仰攻不易我軍精銳微有傷亡都興
阿以一軍當小池口灌港大河鋪三路之衝日夜援應亦極疲勞
其廣濟一路副都統銜巴揚阿率四營往禦賊已退併蘄州之望
天畝合爲一股其蘄州之張家塆青石嶺望天畝等處之賊經知
府邢高魁等勦辦獲勝舒保率馬隊百騎馳往督隊又大勝之其
羅田一路賊已擊退我軍進紮英山霍山頃據下游探報易賊石
達開領股匪數萬人從安慶彭澤分道上犯揚言分擾湖北並援
江西我軍備多力分自應併軍會勦迅遏兇鋒報聞○申諭順天
直隸等處嚴拏私鑄人犯○署兩江總督何桂清奏遵旨察看藩
司何俊精力尙健得旨聞該員精力已衰汝尙顧惜情面足見並
未與前督商酌汝云遽易生手轉恐茫無頭緒設該員卽時因病
出缺尙慮接辦無人耶○戊子諭軍機大臣等德興阿等奏揚營

軍餉缺乏請於上海勸捐抽釐一摺自係爲軍務緊急起見惟捐輸抽釐總宜事歸畫一方不至商民藉口上海地方商販固形旺盛而本處地方已早有抽釐之舉若再由江北派員往收是同一貨物而兩處抽收不但迹近重徵且章程亦難歸畫一上年和春軍營派谷韞燦等往蘇常一帶勸捐曾經諭令停止原以勸捐一事應由地方辦理若由軍營委員勸辦恐地方官紳轉得藉詞諉卸今德興阿等請由江北派員赴上海勸捐抽釐揆諸事宜必多窒礙至沙船捐輸非可視爲常例而抽釐請獎尤爲各省所無亦與江南見辦章程不符何桂清前奏正欲將上海稅務力加整頓尙未辦有頭緒斷不可使令出多門更難釐剔所有上海抽釐及沙船能否勸捐之處著何桂清趙德轍遴委公正明幹之員前往查覈辦理江北糧臺毋庸派員前往經何桂清等此次整頓之後

江海關稅務定有起色進項較多即可兼顧揚營軍餉原不必專指上海一處卽蘇常等府如果捐項有餘亦可藉資挹注江南江北同係該督撫所轄地方不得稍分畛域致令向隅將此由五百里各諭令知之○庚寅諭內閣恆春舒興阿奏委員會辦匪徒迅速肅事一摺雲南武定州屬祿勸縣地方有土匪回匪及川黔外匪先後焚殺滋擾經該督等派令文武各員就見有兵勇旬日之間卽將首匪殲斃餘匪次第剿除不至日久蔓延辦理尙屬安速所有在事出力文武員弁兵練著准其分別擇尤保奏毋許冒濫

○壬辰以恭修 慕東陵 隆恩殿工竣恭請 孝靜康慈皇后

神牌還御○諭軍機大臣等李孟羣奏沿途剿洗皖境續到股匪擬卽進攻霍六一摺此次逆匪二萬餘人自霍邱圖犯湖北李孟羣以二千五百人殲擒渠逆並將夥匪剿殺殆盡實能謀勇兼施

深堪嘉尙員弁兵勇著准其彙入克復英山案內由官文胡林翼分別保奏英山羅田鄉勇協助官兵剿賊甚爲得力並著從優請獎以示鼓勵賊踞霍六兩城又有李兆受一股踞葉家集互爲犄角亟宜乘勝勦洗以除楚豫之患該藩司見紮英霍交界地方著卽會同金光飭合力夾攻迅殲醜類俟攻克霍六餉道疏通仍卽馳赴廬州與福濟諸軍會合剿捕各屬匪黨前據官文等奏易賊石達開領賊數萬從安慶彭澤上犯聲言分擾湖北並援江西等語石逆最爲兇悍此次上竄之賊是否該逆卽在其中抑前往江西想李孟羣必有所聞著探明具奏另片奏請飭湖北在籍刑部主事王柏心赴營等語王柏心學問淹通忠義奮發旣據李孟羣保奏著卽由該藩司傳旨令該員到營幫同籌畫用兵機宜其禮部主事駱敏修應得獎勵著准其併案詳請辦理○予江蘇陣亡

遊擊王紹麟等祭葬世職○癸巳諭軍機大臣等前據何桂清奏逆首石達開由銅井渡江逃往江北曾諭令和春等乘賊內訌規取金陵並諭德興阿等扼其北竄之路茲據福濟鄭魁士奏稱石逆由金陵帶其黨與數千由無爲州前往上游張貼僞示察其詞意因洪逆疑忌石逆懼害脫逃並所獲賊信有易王私自出京誓不回去之語是金陵逆賊內變已成確有實據石達開係著名劇賊且聞其善於要結人心此次逃出金陵必欲自成一隊非上竄湖北卽蔓延江西廣濟黃梅等處官文等已厚集官兵堵剿又有李孟羣在英霍交界地方駐紮屢獲勝仗楚境當可無虞聞江西瑞臨等府皆係石逆攻陷見在尙有賊兵踞守則其竄往江西乃意中之事著福興耆齡探明該逆蹤迹併力截剿乘其人心渙散之際設法散其黨與使該逆勢成孤立迅就殲擒江西各賊自必

聞風瓦解勦辦較易爲力將此由五百里諭令知之○以安徽潁上縣官紳守城出力豁免咸豐五六年新舊錢漕永廣文武學額各三名○予安徽陣亡從九品藍書田等祭葬世職○甲午諭內閣御史尹耕雲奏軍營文員保舉太濫請從嚴分別覈辦一摺前據英桂勝保奏勦辦捻匪出力人員單內有候補知府洪貞謙請交軍機處記名俟補知府後遇有本省道員缺出請旨簡放報捐知府候補知縣張席珍請免補知縣以知府歸河南候補班補用候選知縣薛成榮請免選本班以直隸州分發山西歸候補班前遇缺補用業經降旨允准該御史以文員在營當差不過辦理糧臺文案並無攻堅陷陣之勞獎勵未免過優所奏不爲無見洪貞謙張席珍薛成榮三員著該部另行覈給獎勵具奏請旨其前保之案著卽撤銷嗣後各路統兵大員保舉出力人員務當

秉公覈實毋許冒濫除打仗各員躬冒矢石懋著戰功准其從優請獎外其餘辦理糧臺文案人員必須隨營年久始准錄其勞績酌量保舉仍不得與親厯行陣之員同邀優獎其在營年分尙淺濫竽充數者概不准徇情保奏以杜倖進之門至從前所請記名簡放及指省補用各項文員均著俟該省軍務事竣送部引見再降諭旨○乙未以孫葆元爲禮部左侍郎服闋侍郎○命已革大學士訥爾經額以四品京堂候補○予湖南殉難知縣李春暄祭葬世職○丙申諭軍機大臣等赫特賀滿慶奏廓爾喀呈遞謝恩表文恭齋呈覽一摺前因廓爾喀甫經息兵降旨將本年例貢免其進呈一次以示體恤所賞敕諭已由理藩院頒發諒該大臣等此時當可接奉轉發該國王祇領矣覽此次所進表文情詞恭順具見向化之誠自應加以褒獎著赫特賀滿慶檄諭該國王以此次表

文業經呈覽大皇帝鑒其悃忱深爲嘉悅嗣後但當謹守藩封自能長邀庇佑也表文及鈔錄各件均畱覽將此諭令知之○丁酉諭軍機大臣等本日據譚廷襄奏直隸各屬蝻孽萌生見經飭屬認真撲捕尙未能一律淨盡磁州所屬各村莊及成安元城邯鄲等縣均有飛蝗入境等語河南各屬蝗孽蠢動業已飛入直隸境內其本地傷害田禾當已不少著英桂卽行飭屬趕緊撲捕務期淨絕根株並將辦理不力之員嚴參懲辦將此諭令知之○英桂勝保奏該逆自南照集被剿潰敗後順水向東竄駛臣等飛飭官兵跟蹤追剿一面督隊繼進五月二十七日追至潤河集地方該逆紛紛登船搶奔南岸船隻多被延燒該逆爭先渡河擁擠落水淹斃及斬獲者不下五六百名我兵盡力追殺二十八日追至廟臺集垂岡集八里衝一帶復斃賊二三百名四五百名不等二十

九日馳過潁上縣地方屢經蹂躪村落邱墟且正陽關近又爲捻
竄踞隨征將士枵腹荷戈困苦萬狀見由縣南四十里之黃岡鋪
直擣正陽關對岸沙關賊壘該逆拌死出拒我兵乘其列隊未定
奮力衝擊殲斃逆匪三四百名餘賊奔入壘中三十日臣勝保親
督大隊前進甫抵賊巢見河中檣帆林立船約二三百隻自正陽
直抵沙關又名八里塚地方均有賊眾盤踞該逆搭造浮橋跨河
立壘惟有先將八里塚攻克方能進攻正陽當卽揮兵前進該逆
擁眾出巢於柳林一帶密派馬隊吶喊衝撲我軍兩翼鈔殺而前
步賊先亂馬賊正在援應又被我兵槍礮密擊賊勢不支始各紛
紛敗退兵勇一齊壓下立斃逆匪六七百名餘眾搶過浮橋勢如
蠡擁其不及登岸者大半隨流漂沒我兵一面燒斷浮橋一面排
列槍礮向船轟擊擊沈兩桅大船數隻餘賊併入正陽關壘中立

將沙關攻拔次日復督各隊進剿並飭署廬鳳道金光飭隨同進
攻該逆隔河列隊施放槍礮抗拒我軍水陸夾擊擊沈焚毀大小
船數十隻逆眾紛紛登岸奔逃我兵乘勢偪緊開放連環槍礮該
逆東西狂奔積屍滿岸餘黨逃奔霍邱意欲勾結六霍逆匪又分
畱韓狼子等死踞正陽關看守賊船輜重以期牽掣我師臣等查
霍邱在正陽關西南正陽既爲賊踞如我兵渡淮無論腹背受敵
卽使霍邱攻剿得手而正陽逆黨儻竟乘虛北犯則辦理又形費
手擬攻克正陽關後疏通河道保全潁壽一帶地方再行分兵直
擣霍邱惟臣勝保移兵東剿霍邱與固始毗連西南一帶恐致空
虛已飭南陽鎮總兵邱聯恩等於固霍交界之臨水集一帶聯絡
聲勢分布紮營合力防剿以免霍邱餘燼復然臣英桂見於初五
日馳抵潁州督飭見帶兵勇分赴沙河兩岸偵探匪蹤隨時殲滅

以清餘孽而爲後路聲援

臣

勝保見於正陽關北岸逼近紮營添

造礮船水陸夾攻奪取正陽關翦除寇黨皖豫連境一帶可望漸

次肅清又奏正陽逆匪自失北岸巢穴後併股死踞正陽關張龔

各逆首亦自霍邱潛來合力死拒

臣

勝保於閏五月初四日飭金

光飭搭造浮橋並撥得力兵勇抽派吉林黑龍江馬隊同往磨河

口助戰

臣

親督大隊由北岸前進該逆於正陽西北柳林中分搭

浮橋三座卽由浮橋撲過馬步賊眾數千人直前迎拒

臣

勝保分

兵兩翼以待該逆將次撲進卽從其旁鈔裏衝擊立砍執旗馬賊

十餘名槍斃步賊百餘名該逆驚亂回向浮橋奔竄我兵乘勢追

殺共斃逆匪五六百名該逆急斷浮橋覺水逃命我兵正開槍礮

轟擊遙見南岸亦已進攻兵勇直抵關下方欲撲壘而進詎該逆

先用馬賊伏匿東南鈔過金光飭兵勇之後壽春練勇先自潰亂

逆眾蠡擁壓下

臣

勝保急麾馬隊速渡南岸並傳令步隊官兵隔

岸施放槍礮橫擊斃賊甚眾正在分布收隊聞當據該營飛報金光筋左骸被創猶立船頭麾兵督陣迫逆眾撲近岸邊船夫猛力砍斷篾纜不期沙河湍急舟卽盪覆金光筋登時陣亡查金光筋以文吏盡瘁行閒善政武功爲皖中軍興以來首屈一指乃爲賊所乘致沒於陣殊堪憫惜仰懇 天恩優卹以慰忠魂 上諭軍機大臣等捻匪竄往霍邱僅畱韓狼子等逆看守輜重死踞正陽是該關捻眾無多不難卽時克復見在官軍若赴霍邱固恐腹背受敵若久爲正陽牽掣則張龔等逆又得嘯聚裹脅勢復猖獗必須乘此聲威迅將正陽關攻克方能併力南驅殲捻巨欸著英桂勝保督飭帶兵將弁剋日進攻不可遲緩金光筋督戰陣亡其所帶練勇向稱得力必須速爲收集選派得力大員管帶俟克復正

陽後即可派令帶勇防守至廬鳳道一缺此時尤爲緊要著卽咨
明福濟或卽飭張光第回任或另委明幹妥員接署以專責成將
此由六百里諭令知之○予安徽陣亡署廬鳳道金光飭祭葬世
職如布政使例於壽州建祠諡剛愍○庚子諭內閣御史尹耕雲
奏大員獲咎太重請收回成命以嚴賞罰一摺前任大學士直隸
總督訥爾經額因逆匪北竄堵剿不力革職治罪原以行軍失律
法所必懲嗣因北路肅清量從末減茲由西陵當差回京念伊
久膺疆寄曾入綸扉予以四品京堂俾知感愧並非假以事權卽
使訥爾經額年力未衰尙堪重任朕用一威望頓減之員實難期
其振作正與從前棄瑕錄用復任封圻者不可同日而語況人材
黜陟朕心自有權衡該御史所奏著毋庸議○奕山等奏五月二
十八九等日俄羅斯有七八百人分駕木輦隨帶小船舫駛駛至

海蘭泡停泊建房二十處並安設礮位協領巴達朗貴會晤木里
斐岳幅據稱請做照恰克圖通商或可彼此相安並稱後起人數
尙多奏入 上諭奕山等據理折辯妥爲防範○辛丑諭內閣德
興阿翁同書奏火攻船隻駛進瓜州大口陸軍進剿均獲勝仗一
摺五月二十八日總兵鞠殿華帶領馬步隊分路進攻搶渡重濠
徑撲賊壘德興阿在江岸督攻翁同書在四里鋪督攻陳國泰統
帶大小師船將火船突入大口焚燒立將賊匪攔門巨艦數隻及
雙桅三桅各船並旁營礮臺房閒毀盡守卡賊匪投江者無數各
路兵勇越過重濠用火彈噴筒大礮攻擊殲斃黃衣賊目多名瞭
墩十餘座瓜州突出賊四五百人又殲斃一百數十名同日余萬
清等進攻鎮江約斃賊三百餘名毀賊米船十三隻並斃僞糧檢
點覃元發一名水營參將李新明在石埠橋焚燒賊卡數處斃賊

數十名生擒九名此次水陸會攻疊獲勝仗勦辦尙爲得手著德
興阿等乘此聲威迅將瓜州克復肅清江面毋再遲延○何桂清
奏查咸豐二年賊竄江南儀徵江浦屢經失陷而六合介儀徵江
浦之間時已革道員溫紹原署理該縣於聞警之初卽倡募水陸
各勇激勵紳團並派閒謀確探賊情豫爲之備故能將撲城賊眾
一鼓殲滅後雖數犯疆圉均能出奇制勝且以其餘力上搃江浦
下救儀徵北援來安江北大營得免西顧之憂而自來安至廬州
尙有一綫餉道可通者亦惟溫紹原是賴今臣欽奉恩命權任兩
江責重事艱當以用人爲急務查通省才足匡時如溫紹原者實
不多見該員因公獲咎情有可原且溫紹原雖奉督辦六合江浦
團練之命究係無職人員深慮民情解體仰懇 天恩俯准將溫
紹原開復原官仍以江蘇道員補用以爲維繫眾心之計 上諭

江蘇已革候補道溫紹原前在六合縣任內激勵紳民辦理團練
屢次擊退悍賊保障孤城頗資得力嗣因干預保舉經德興阿奏
參革職朕念其數年以來保衛江北爲地方出色之員業經諭令
德興阿等責其會同官兵攻復江浦以贖前愆茲據何桂清奏稱
該革員雖已奉旨督辦團練究係無職人員深恐呼應不靈溫紹
原著卽開復知府仍俟克復江浦後再行奏請獎勵○何桂清奏
自溧水克復後和春本擬酌調勝兵北赴句容爲四面合圍之計
而該逆一萬數千人在相距溧水五六十里之湖墅鎮龍都鎮秣
陵關三處犄角紮營一以防我溧水官兵乘勝直擣金陵一圖回
撲溧水並由旁路內犯以致此路萬餘兵勇不能酌撤見在和春
張國樑已派傅振邦統帶兵勇八千名由高陽橋進剿虎嵩林統
帶兵勇二千四百名分紮溧水城內外以爲後路接應前總兵李

志和統帶兵勇一千餘名駐紮洪藍埠以固溧水後路據報賊之兇悍者咸集句容城及湖墅等處金陵城內死黨不過七八千人餘皆脅從老弱自石逆遁赴江北後溧水又經克復金陵賊眾本已危懼而洪逆性復殘忍大有眾叛親離之勢至鎮江逆匪中之裹脅來江願求自拔而不得者經余萬清設法解散不少雖有可乘之機無如兵力較單未可冒昧從事而我之健將精兵悉盡力於句容湖墅又未便輕議撤動致爲賊所乘必俟克復句容方可移兵東向一鼓而下鎮城其瓜州賊清與鎮相等當溧水將次得手之時鄧紹良亦於五月二十二至二十五等日連次攻勦蕪湖賊匪雖經踏平二壘一時尙難得手見擬分兵老鴉山接濟吳全美等水師爲水陸並進之計臣仍會商和春張國樞鄧紹良嚴催諸將迅速進攻以冀上慰宵旰之憂上諭軍機大臣等溧水克

復該逆尙在湖墅鎮龍都鎮秣陵關三處紮營阻我軍進攻之路
必須句容克復方能分兵直擣金陵而該逆內訌自相殘害機會
自不可失因思徽甯一帶見在情形稍鬆鄧紹良一軍若能乘虛
攻擣金陵則並可牽制句容賊勢似屬一舉兩得惟該提督旣須
嚴防逆匪內竄之路兵力是否足資分撥著和春與何桂清妥爲
籌畫如有出奇制勝堵穴擒渠之計卽行會商布置毋失事機御
史錢桂森奏德興阿懦蕙無能久未與賊打仗奏報獲勝情形諸
多不實侍衛蘊秀性情乖謬遇事把持等語又聞德興阿近日患
病行動維艱是否確實著和春何桂清密加察訪據實具奏將此
由五百里諭令知之○諭軍興以來吉林黑龍江馬隊官兵先後
調往各路軍營助剿爲數約有一萬三千餘名除經統兵大臣及
各督撫奏明撤回歸伍外計見在江北江南湖北及徐宿皖豫等

處畱營備勦者吉林兵尙有六千餘名黑龍江兵尙有二千餘名該兵丁等與南方水土本不相習出征日久不免疲勞患病且南省又多水田港汊馬隊難以施展之處亟應分別撤畱以休兵力而收實用著德興阿和春官文胡林翼邵燦庚長福濟英桂勝保等各就該處軍營查明見存吉林兵若干名黑龍江兵若干名酌量可撤者先行撤回歸伍其地勢旣屬相宜兵力亦無疲乏見資攻勦必不可少者仍著畱營調遣俟該營兵力足敷再行分起奏撤將此由五百里各諭令知之○怡親王載垣等議覆署直隸總督譚廷襄奏推行大錢鈔票章程一准州縣分設票局一持票取錢先儘餉票給發餘仍舊照掣字辦理一票價隨銀長落一加卯鼓鑄以資搭放均應如所請辦理從之○壬寅諭內閣禮部奏遵議越南國獎勵一摺前年福建兵船遭風漂至越南由該國供給

錢米銀一千餘兩經兩廣總督葉名琛遵旨將銀兩給還該國王
堅辭不受具見惻忱可嘉之至著降敕褒獎並賞給該國王金瓶
如意段疋等件該督接奉諭旨卽先行知該國王仍俟奉到敕諭
賞件遇有該國便船飭令攜帶回國如無便船則移交廣西巡撫
酌量妥寄以示朕懷柔遠人至意○諭軍機大臣等慶英奏賊匪
滋事占踞回城請飭籌撥餉需一摺據稱五月間有浩罕賊匪先
在喀什噶爾之七里河沿官水磨一帶盤踞圍城放火延及英吉
沙爾該處伯克逃散回城已被占踞見經該大臣調集伊犁喀喇
沙爾官兵前往援剿惟軍需浩繁喀什噶爾英吉沙爾兩處兵丁
缺乏鹽菜已有八九箇月葉爾羌庫款無存雖有陝甘解來生息
等項銀一萬六千餘兩杯水車薪難敷支給亟須多爲籌款以備
攻剿著樂斌在於該省無論何項設法籌撥銀數萬兩迅速解往

葉爾羌藉資接濟毋稍延誤將此由五百里諭令知之○諭本日據慶英奏喀什噶爾突有賊匪滋事延及英吉沙爾復據奏賊占回城官兵出隊獲勝各一摺浩罕賊匪倉卒起事膽敢攻撲喀什噶爾回城並延及英吉沙爾侵占回城雖經官兵剿擊獲勝而該匪裹脅回民勢極猖獗必應趕緊撲滅以免蔓延慶英見由葉爾羌派撥官兵援剿並知照調任喀什噶爾領隊大臣裕瑞帶土爾扈特和碩特官兵三千名會剿著卽飛催前進其咨調伊犁官兵一千五百名著扎拉芬泰於領隊大臣內揀派一員統帶剋日由冰嶺馳赴喀什噶爾以資剿辦巴爾楚克爲南四城門戶地方緊要該大臣擬由阿克蘇派兵二百名駐紮著照議辦理喀什噶爾既有官兵二千名自應先就見有兵力迅速剿捕不得坐待外援致令蔓延烏勒欣泰顯有畏葸避退情形著該將軍等查明參奏

所請陝甘撥銀數萬兩解往等語已諭令樂斌趕緊籌解矣將此
由五百里各諭令知之○癸卯諭內閣王懿德奏收復府縣城池
並連城獲勝一摺江西逆匪竄踞福建光澤縣城五月十四日經
各鄉聯甲壯丁糾集萬餘人攻入城內殺斃逆匪無數餘匪紛紛
竄逸當將城池克復見經護理延津邵道王肇謙督催將弁由大
幹一帶勦洗直抵邵武其汀州府城被匪攻陷後知縣龐立忠招
集田兵先後勦殺賊匪九百餘名紳士丁捷芳率壯丁助勦殲賊
百餘名田兵愈聚愈多該逆於四月初四日竄往上杭沿途復追
殺百餘名隨即克復府城該府所屬之連城縣於是月二十三日
被匪攻撲知縣延棟會同將弁紳勇登陴守禦羈斃賊匪二十餘
人西門勇力較單被該匪闌入適文亨里各鄉紳士羅彤書等率
帶壯勇助勦擊斃逆匪數百人餘匪四散又分路追殺二百餘人

割取首級數十顆民心效順餘匪四散著王懿德督飭各路文武官紳兵勇將邵武府城並泰甯等縣以次攻克盡殲醜類此次出力官紳兵勇著該督分別奏請獎勵殉難各員著卽詳查請卹○乙巳諭內閣晏端書奏餘杭土匪滋事擒獲首要各犯正法地方肅清一摺浙江餘杭縣北鄉有匪徒胡萬城與陳玉峯等糾黨劫掠村民抗糧攬稅經該撫等派委大小文武員弁帶兵剿捕將首要各犯擒獲正法地方見就肅清辦理尙屬妥速所有該管地方文武各官應得處分均著加恩寬免其在事出力文武著准其擇尤酌保數員候朕施恩○諭軍機大臣等蔣肅遠奏鎮遠餉米缺乏請借碾湖南倉穀一摺據稱鎮遠叩水防剿兵勇待食孔亟府縣倉穀碾動無存勸捐採買均無所出前經戶部奏撥湖南丙辰年地丁銀兩歸還黔省採買借支之款恐一時未能照數撥解請

於辰沅二府撥借倉穀三萬石碾運鎮遠軍營等語鎮遠逆苗滋事兵食緊要自係實在情形湖南應解貴州銀兩一時既未能起解卽將倉穀碾運亦屬轉移辦理著駱秉章卽於辰沅兩府屬倉穀內碾動三萬石運赴鎮遠以資接濟俟秋成後察看情形卽由湖南撥銀採買還倉同碾運腳價一併在於應解貴州銀款內扣除將此由五百里諭令知之○予浙江陣亡縣丞黃柏垣等祭葬世職○丁未諭內閣慶祺奏鋪商呈請捐輸助鑄鐵制錢如蒙允准卽由該商等普行勸諭京城各鋪一摺近來京城物價昂貴小民生計艱難朕以當十鐵錢漸形壅滯特命鐵錢局及戶工二部添鑄鐵制錢以便民用雖一時尙未充裕而以後源源搭放閭閻得資周轉物價自可漸平此項經費業由部臣籌及何至苛派小民該商等如果情殷報效見有捐銅局火器營皆可仰邀獎敘正

不必以鋪捐爲名託詞報效況京師大小鋪戶不下數十萬家豈能憑此數十人呈詞遂謂商情悉協據單內所開鋪商任大卿等既非部院官員又非紳士豈可委令勸捐致開抑勒包庇諸弊當此物力支絀之時朕方期設法調劑以恤民艱若令大小鋪戶逐日攤捐物價必因此更昂尤非體恤兵民之道國家理財自有經權何得任聽市井細民妄行干瀆所奏著不准行○諭軍機大臣等本日據西凌阿慶昫奏熱河豐甯縣所屬大閣兒地方聚有匪徒約一二千人焚毀衙署搶掠鋪戶居民業經熱河道帶兵前往查拏並由西凌阿等派兵往多倫諾爾地方擇要堵截各等語此股匪徒何以忽然聚集至一二千人之多其有無地方官激變及諱盜貽患各情著英隆迅卽查明啟釁根由據實具奏其熱河道帶兵若干是否足敷勦辦並著酌度辦理總期一鼓殲擒毋致蔓

延爲患至多倫諾爾地方與大閣毗連該匪徒業經熱河官兵查拏卽須防其竄入旣據西凌阿等派委總管特克慎等帶兵四百名前往著卽飭令該總管等認真堵截與熱河官軍會合兜拏毋任竄逸將此由四百里各諭令知之○以紳團出力永廣湖北羅田縣文武學額各二名○戊申諭內閣恆春奏分剿回夷獲勝情形一摺雲南賓居賊匪疊剿未淨官寨匪徒竄入阿那邑糾聚回夷敗匪負隅抗拒五月初一等日經遊擊孫鈺等帶兵攻剿節次共斃匪三百五十餘名又四川守備王占榮等於四月十三等日進攻阿那邑打磨山曰者鄉等處共斃匪一千數百名生擒十七名並傷紅衣賊首二名焚毀賊營四座奪獲槍礮牛馬甚多剿辦尙屬得手仍著恆春激勵將弁將賓居及曰者鄉逆匪殲除淨盡毋畱餘孽其紅岩地方自三月中攻克經該督屢催代理鶴麗鎮

總兵福兆督兵進攻該員久未與賊接仗實屬玩延著先行摘去頂帶以示懲儆仍暫畱本任責令進剿倘再不知奮勉卽著嚴參治罪陣亡兵練著查明彙案請卹○諭軍機大臣等前據慶英奏喀什噶爾賊匪延及英吉沙爾當諭令扎拉芬泰調伊犁官兵一千五百名派領隊大臣一員馳往剿辦茲據該將軍奏稱由伊犁派兵有需時日不若在南路各城就近酌調已函屬新任伊犁參贊大臣法福禮暫緩赴任卽著行抵處所就近調度防剿兼籌並據裕瑞奏慶英咨調蒙古兵三千名俟奎棟到任卽管帶啟程各一摺喀什噶爾賊匪倉卒起事人數本不甚多該城有官兵二千名何以不能堵禦且恐烏勒欣泰畏葸張皇致滋延蔓該將軍以南南路各城官兵足資剿捕已屬法福禮就近調度籌畫尙屬妥協仍當偵探情形如賊勢猖獗必須伊犁官兵往剿再行酌調總期

剋日翦除以安邊圉法福禮已由葉爾羌啟程著卽會同慶英妥籌勦辦無誤事機儻情形緊急卽飛咨扎拉芬泰酌調官兵星夜馳往援應至土爾扈特霍碩特蒙古兵三千名據裕瑞奏稱該蒙古兵進山度夏距城窵遠恐一時未能湊集兼恐餉需不繼著扎拉芬泰傳諭裕瑞可將此項蒙古官兵酌調二千名俟奎棟到任裕瑞卽帶兵星速馳赴喀什噶爾援應所需鹽菜口糧卽咨由烏魯木齊如數運送再據扎拉芬泰奏遵查阿爾噶依圖金廠一摺該處金廠雖經明誼咨覆自上年申明禁約後見在尙無民人偷往挖金惟愚民趨利若鶩自應隨時查辦毋令外夷藉端起釁明誼已派奇車木布哲倫等往卡外查勘著扎拉芬泰與明誼嚴飭所派員弁認真巡查如有流民偷挖情事務令悉數勒回以息爭端將此由五百里諭知扎拉芬泰法福禮慶英並傳裕瑞知之○

諭樂斌奏喀什噶爾等處賊匪滋事請飭山陝等省籌辦餉需一摺喀什噶爾突有浩罕賊匪糾眾滋事延及英吉沙爾占踞回城見經伊犁將軍扎拉芬泰等調派官兵前往勦辦餉需刻難緩待經樂斌將河東解到協餉分撥葉爾羌伊犁阿克蘇三處暫濟急需此後甘省無項可撥著王慶雲會望顏各飭該藩司設措銀十萬兩卽日派員解至甘肅分撥應用其該二省欠解協餉並著源源報解俾資接濟至山東河南積欠甘餉爲數甚鉅前曾諭令山東儘先籌撥七十萬兩河南儘先籌撥四十萬兩見仍未據解往著吳廷棟英桂各先行籌解銀一二十萬兩下欠之數亦著陸續措解毋再宕延將此由五百里各諭令知之○以浙江捐輸軍餉永廣鄉試中額一名仁和縣學額八名蕭山三名烏程二名海甯歸安鄞鎮海餘姚長興海鹽各一名○己酉諭軍機大臣等前據

德興阿等奏請於上海勸捐抽釐當經諭令仍歸該督撫辦理並
諭何桂清等不分畛域酌撥餉銀接濟江北該督等諒必遵旨籌
撥矣本日據德興阿等奏揚營餉絀請飭江海淮宿等關於部撥
欠解之餉迅速籌解並請飭催山東等省欠解各款等語各省撥
款解到尙需時日著何桂清等於江海關稅銀及捐輸項下速撥
銀五六萬兩務於六月內解赴揚州軍營俾資支放其淮宿等關
本有欠款並著查明催提趕解毋誤軍需該署督前派王有齡前
赴上海辦理稅務見在有無把握蘇松常太等屬捐項有無起色
著何桂清等悉心籌畫隨時挹注以濟江北軍營將此由五百里
諭令知之○諭德興阿翁同書奏揚營餉絀請飭山東河南陝西
等迅解撥款一摺揚州軍營前因餉需不足裁汰兵勇見在兵減
而食仍不繼減放停支艱窘萬狀各省部撥之項自應迅籌起解

以維大局所有山東欠解揚營銀兩著吳廷棟迅速撥解河南省
雖見辦軍務亦應酌量籌撥至陝西省按月籌濟揚營之餉雖經
該撫於五月間奏請由部改撥惟據德興阿等奏稱此項餉銀業
已半年未解所有前欠銀兩仍著曾望顏卽飭藩司籌款陸續補
解以資接濟毋誤軍需將此由五百里各諭令知之○諭德興阿
等奏請飭山東等省撥款接濟並德興阿等清字摺所稱餉缺情
形覽奏均悉揚州軍糧缺乏前已諭何桂清等整頓江海關稅務
俟有起色卽可兼顧揚營茲復諭令何桂清等速撥銀五六萬兩
以資接濟其山東河南陝西三省欠解之項亦已諭令各該撫陸
續撥解矣見在糧臺告匱眾兵待哺嗷嗷該大臣等惟當加意拊
循不使藉端鼓譟常州僅隔一江何桂清又素能不分畛域諒必
先其所急陸續接濟近日金陵內訌溧水已克機會大有可乘著

德興阿激勵各軍攻復瓜州破其犄角之勢庶幾鎮江孤立亦易得手毋因暫時缺餉貽誤事機將此由五百里諭令知之

東華續錄

咸豐七十二

臣王先謙敬編

臣陶濬宣恭校

六月庚戌朔諭內閣和春奏陳奏事件久未接奉諭旨請飭部查明等語據稱自上年十二月起至本年三月止該大臣陳奏摺件所奉明發諭旨均未接到部文著該部迅即補鈔飛咨該大臣欽遵辦理並著查明是否發遞遲延抑係沿途遺失專摺參辦嗣後各路軍營奏報所奉諭旨該部即迅速鈔錄由驛馳遞不准稍有積壓如再遲誤以致各該省紛紛奏請補發者著該部堂官查明係何處遲延積壓即行參處以肅郵政○諭軍機大臣等前據西凌阿慶昫奏熱河豐甯縣大閣兒地方聚有匪徒約一二十人焚毀衙署搶掠鋪戶居民業經熱河道帶兵前往剿辦並飭總管特

克愼等堵拏復據英隆奏大閤兒地方有匪徒聚集搶掠經巡檢盛祖培等往捕將首先糾搶滋擾之劉幅汰等格斃餘匪旋各四散本日據譚廷襄奏灤平縣寶山寺地方又有礦匪與民人互鬪見令護理提督及口北道等分別督辦等語此股灤平縣匪徒是否卽係豐甯縣匪徒抑係另股滋事著譚廷襄確切查明並因何起釁根由據實具奏卽飭該護理提督等認真勦辦迅速撲滅毋任蔓延進口難民尤應認真稽查勿令奸宄溷迹將此諭令知之○諭福濟鄭魁士奏李孟羣一軍需餉甚迫請飭豫省就近分撥並廬州待餉請飭各省速解一摺安徽藩司李孟羣由湖北赴援廬州需餉甚亟廬州至羅田英山道途梗阻不能繞運且無可分運之款河南欠解皖餉九萬七千兩李孟羣行營距豫較近著英桂先撥銀數萬兩迅速解赴羅英一帶李孟羣軍營以資接濟至

廬州兵餉山東閒斷報撥每次不過數千爲數太少著該撫寬爲籌備按月如數報解毋許延誤山西陝西每月應解皖餉五萬兩見僅解銀二萬兩該二省協濟各處軍餉較多惟廬州待餉甚急仍著各該撫設法籌撥源源接濟將此由五百里各諭令知之○予江西陣亡府照磨張文治等祭葬世職訓導曾獻謨等祭葬世職建祠○辛亥諭內閣李鈞奏請續頒寶鈔一摺見在節交伏況所有東河修理事宜應添物料錢糧自應寬爲籌備著戶部卽行頒給寶鈔二十四萬串以濟工需○諭官文胡林翼奏黃梅蘄州官軍分路剿賊獲勝毀平賊壘一摺湖北黃梅蘄州之賊由安徽宿松等處竄竄其踞黃梅大河鋪者連營二三十里並分竄十里鋪等處五月十四等日將軍都興阿等連破大河鋪等賊七壘二十二日又破十里鋪賊壘分軍進紮賊之來撲及分擾黃梅縣城

廣濟縣境者均經各路兵勇分投擊走擒斬甚多東北路賊十餘營悉行遁走其竄踞蘄州張家塆一帶者分撲胡家涼亭鴨公觜等軍營官軍連戰斬獲千數百名不等賊踞望天畝並於黃土岡等處結壘二十七八等日官軍連次進擊並合蘄州紳勇鈔破范家灣張家塆賊壘斃賊二千餘名官軍乘勢進剿閏五月初二等日先燒汪家壩夫子嶺賊營二座連次斃賊一二千名或數百餘名黃土岡等處賊壘亦悉毀平張家塆黃土岡賊竄至望天畝等處伏匿不出官軍連日進攻均有斬擒知府邢高魁朱啟仁率勇至青石嶺將山岡下賊巢數十間焚毀復斃賊千餘名安徽逆匪大股伺竄疊經剿洗仍著官文等飭令帶兵文武悉力扼剿務將全股肅清○諭耆齡奏吉安一軍剿賊獲勝一摺吉安賊匪屢次出撲均經我兵擊退五月十六至二十四等日賊眾分撲各營我

軍連日大戰斃賊二千數百名記名道王鑫由吉木進勦水東南
抵周家嶺逆匪分三路來撲王鑫俟該逆逼近親率弁勇鏖戰一
時親兵李繩武等連殺悍賊數名賊隊大亂伏兵齊起縱橫截擊
斬首七八百落河者千餘人踏賊五營統計斃匪數千勦辦尙屬
得手所有王鑫一軍著耆齡擇尤保奏以示獎勵○諭軍機大臣
等勞崇光奏需餉急迫請飭川廣等省速籌接濟等語廣西省地
處邊遠連年用兵羅掘已空見在柳潯二府尙稽克復更須勦辦
靈興股匪兵丁索欠甚或結隊追呼亟須他省籌濟方可藉資支
持今年僅據葉名琛撥銀一萬兩駱秉章撥銀二萬兩杯水車薪
實屬艱窘湖南省尙有部撥未解銀三萬兩勞崇光已移咨該撫
籌解著卽設法撥付四川有協濟廣西經費銀十萬兩未經報解
著吳振械迅卽如數撥往廣西應用此外廣東已撥未解銀十七

萬七千餘兩浙江已撥未解銀四萬兩並著葉名琛晏端書移緩就急剋日措撥勿再遲誤惟廣西情形緊迫該省道途寫遠解到需時駱秉章素能不分畛域協濟鄰疆著再行籌撥銀兩陸續解赴廣西俟川省解款行抵湖南境界劃扣歸抵如此就近那移當可接濟要需將此由五百里各諭令知之○王子諭內閣舒興阿奏雲南省需餉孔亟請飭催各省趕解一摺著戶部迅速查明欠解雲南餉需省分分別嚴催解往○舒興阿因病乞假命來京以內閣學士候補以桑春榮爲雲南巡撫劉源灝爲雲南布政使徐之銘爲湖南按察使前湖北按察使○邵燦庚長奏逆捻李月一股回竄王家澗子舊巢閏五月十四日伊興額等率馬步隊四面進逼該賊堅匿不出我軍用大礮連環轟擊復用火箭火彈施放入圩斃賊百餘名賊眾驚亂意欲乘隙逃竄十五十六等日我軍槍礮環

攻兵勇同時並進博崇武朱玉成首先踰濠而上身中槍傷仍殺賊不肯稍退將士一擁而入立將賊圍攻破殲斬無算餘賊從缺口逃去伊興額等率兵奮力追剿殺斃馬步賊三百餘名卽將王家溝子賊圩立時踏毀統計殺賊一千八百餘名生擒六十一名割取首級三百八十五顆奪獲器械牛驢車馬無數見仍酌畱兵勇搜剿岳家集餘黨臣等仍飭各員弁確探李逆蹤迹務殲渠魁以絕根株報聞○癸丑諭內閣王懿德奏官軍克復邵武府城一摺福建汀州光澤等城池克復以後經王懿德飭令代理臬司趙印川保升參將畢定邦等統率官軍進攻邵武師次麻沙地方逆眾數千人由沙溪黃塘等處來拒官軍會合西鄉團練奮勇進剿殲斃賊匪無數城內之賊聞風膽落紛紛逃竄經畢定邦等分投截剿殲斃數百名城外賊巢悉行焚毀卽於閏五月初九日將邵

武府城收復零匪按捕淨盡所有在事文武員弁紳勇實屬奮勉出力著王懿德查明保奏○諭袁甲三奏連營進逼鄧圩並分剿援賊營獲勝仗一摺五月十五十六等日我軍連營分布相度地勢搶築營壘該逆百計抵拒均卽擊退二十八日逆匪糾約姚圩馬步賊匪千餘乘虛撲擾營後鄧圩之賊同時亦出五六百人擾我新營袁甲三飛派各營兜擊匪眾不支繞道竄回我兵追殺無算二十九日復派馬步兵勇徑撲姚圩斃賊二百餘名並截殺伏賊數百名奪獲槍械旗幟多件初二日擒首劉老淵等率眾三四百人接應鄧圩賊匪我軍鈔裹生擒擒首劉開等四名並將賊眾莊房一律焚毀鄧圩出拒之賊聞風遁回我軍乘勝追殺屍橫遍野二十二日乘夜進攻搶進外濠拋擲火器燒斃賊匪無數匪勢甚爲窮蹙著袁甲三督率員弁兵勇嚴密堵截迅擣賊巢務將姚

鄧兩圩次第廓清毋稍鬆懈○諭軍機大臣等前因御史吳焯奏黑龍江呼蘭城迤北蒙古爾山地方有荒原百餘萬晌可以開墾當降旨交奕山將有無窒礙情形檢查從前原案據實具奏茲據該將軍派員前往踏勘明確繪圖貼說奏稱自綽羅河起至通肯河止覈計卡倫內外其有可墾地畝一百二十萬三千餘晌等語蒙古爾山等處向係吉林採獲捕珠之地見據查明可開地畝既有一百二十萬餘晌之多何以歷年經久並未查辦從前或另有深意該將軍請將吉林採獲捕珠之地一併開墾毋庸封禁有無窒礙之處著景淳會同奕山各派妥員按照可墾地方再行詳晰查勘悉心妥議據實覆奏將此各諭令知之尋奏蒙古爾山一帶向有產生淺珠之名惟自綽羅河至通肯河以及呼蘭河等處水淺山微淺苗甚稀蚌蛤不殖卡倫荒原地僻人稀從未議及開墾

此外並無深意拘泥封禁殊爲可惜下戶部議尋奏該處既有荒地一百二十萬餘晌之多自於度支有裨但弛禁開墾必期有利無弊應請飭下該將軍等詳細妥籌若於濬務珠務屯務邊務一有妨礙仍請嚴行封禁從之○乙卯邵燦庚長奏徐軍破王家灣子賊圩後伊興額等駐軍岳家集旋探李月在蒙宿交界屯踞並有逆夥赴淮南求救於張落刑伊興額卽帶馬步兵勇由高家寨進剿該逆分股迎拒我軍佯退誘賊伊興額揮兵回戰斃賊二百餘名匪眾驚潰復追殺三四百名李月帶死黨百餘北竄永境當派兵勇分投堵截伊興額親帶馬步各隊晝夜窮追探明該匪暫匿陳家集我軍四面兜圍斃賊五十餘名伊興額親自開槍將李月擊中落馬又被勇目李大有砍傷擒獲訊明正法餘賊亂竄追剿十餘里悉數殲盡並無一名漏網統計殺賊八百餘名割取首

級二百七十餘顆奪獲器械羸馬無算臣等查李月與張落刑等

同惡共濟蔓擾三省仰賴 聖主洪福得以生擒正法伊興額身

先士卒親擒擒首實屬謀勇兼全應如何優加獎勵恭候 聖裁

上諭內閣擒首李月與張落刑等樹幟糾黨圍攻城池擾害地

方罪大惡極經邵燦庚長派委伊興額等督率兵勇生擒正法盡

殲醜類實足伸國法而快人心副都統銜侍衛伊興額著賞給額

圖渾巴圖魯名號所有在事出力員弁兵勇著准其擇尤保奏候

朕施恩邵燦庚長調度有方邵燦著加恩賞戴花翎庚長著交部

從優議敘○諭軍機大臣等和春奏官軍克復句容縣城一摺該

大臣等奮勇可嘉將士用命見在句容縣城防守及善後事宜布

置想已妥協著卽乘此聲威移兵鎮江迅圖克復本日已諭令德

興阿等督率各營兵勇攻勦瓜州並飛調水師進逼金山等處杜

賊匪往來援應之路南北夾攻更易得手鎮江克後再圖金陵該大臣等迅奏膚功同膺懋賞朕不勝殷盼江南大營勇將林立惟文職大員可與商酌機宜者較少何桂清於江浙地方情形甚爲熟悉前次攻剿徽甯賊匪調度有方近日籌給餉糈接濟大營不遺餘力嗣後該大臣等進兵機宜可與該督就近函商以期集思廣益悉臻妥善張國樑已升任湖南提督疊荷恩施諒能益加奮勉與和春協力同心統籌營務仰答朕恩也將此由六百里諭令知之○諭據和春何桂清先後馳奏官軍克復句容各一摺覽奏甚慰此次句容克復卽應迅攻鎮江扼斷江路以次進取金陵惟鎮江瓜州爲江面鎖鑰金山屹峙中流必須兩岸官軍及江面水師同時並舉已諭知德興阿等迅速進攻據德興阿等前奏軍餉缺乏甚形拮据業經諭令江蘇督撫速撥銀五六萬兩解赴揚營

該大臣等所請派員赴上海收捐旣已降旨停止該督撫自應力
籌兼顧毋誤事機至和春軍營所需犒賞何桂清旣徧諭將士此
時尤應迅速發給以勵軍心和春張國樑均能奮勇圖功營中健
將亦復不少惟少文職大員隨時商榷軍情何桂清向能實心任
事朕已諭令和春與該督就近函商庶可集思廣益見在文武和
衷已有明效何桂清必能與和春等同心協力迅奏膚功以慰朕
望所有句容善後事宜著該督卽派妥員辦理至石逆有竄犯徽
州之信雖經擊退仍恐匪黨踵至繁昌青陽等處並形喫重江西
浮梁景德偏近婺源雖經晏端書派去兵勇三千名而隘口紛歧
能否兼顧從前徽甯有警皆由向榮軍營抽撥兵勇赴援何桂清
在浙時與張芾鄧紹良等會商調度均合機宜今旣兼轄兩江如
徽郡等處應須調兵往援卽著與和春妥商籌派金陵賊情渙散

有隙可乘鄧紹良一軍能否先行政打以爲牽制之計想該督已籌畫具奏在途矣再有人奏江蘇候補知州段洪恩前因諱盜參革於克復嘉定案內開復嗣因查有虧空復行革職六年九月完繳開復其自參革至開復九年之間不繳虧項見在省城差委於寓所設立刑具擅拏民人問案勒令捐輸匿不詳報種種聲名狼藉等語著何桂清按照所參情節確實查明從嚴參辦以肅官常原片著鈔給閱看將此由六百里諭令知之○諭本日據和春等奏克復句容縣城見籌進取鎮江後卽可專攻金陵等語江南軍營將士用命得以連克堅城日有起色惟鎮江瓜州勢成犄角非南北岸併力進攻則賊眾互爲應援官軍難於得手見在和春等旣移重兵圍剿鎮江著德興阿翁同書激勵將士約期攻剿瓜州不得再有宕延至上游水師本歸德興阿等節制著卽飭令葉常

春等各率弁兵同時並舉下游焦山師船一併檄令援應屆時陸兵攻剿鎮江水師即可乘機將金山銀山蒜山等賊營殲盡俟克復鎮江卽於金山安設水師以爲大江鎖鑰使金陵賊匪不能復行下竄該大臣等督師日久亟應乘此事機順利迅速奏功瓜州蕞爾之區非縣城可比經年累月糜餉勞師毫無把握德興阿等尙復何顏對朕耶至該營餉需前曾諭何桂清等於江南關稅等款內分撥接濟諒必陸續解到本日復諭令迅速酌撥以資散放矣將此由六百里諭令知之○實授何桂清兩江總督○以克復句容縣城賞和春太子少保張國樑黃馬褂○丙辰諭內閣御史陳慶松奏米糧來源阻滯請飭直隸總督曉諭商販接濟一摺京師人煙稠密民間糧食全賴近京一帶源源販運以資接濟本年春夏以來雨澤應時直隸各屬產糧處所麥收亦屬中稔乃近日

糧價逐漸加增顯有商販把持居奇牟利或地方官強分畛域不令米糧出境於京師民食殊有妨礙著譚廷襄嚴查各屬如有禁遏米石出境者卽行參辦並出示曉諭商販人等源源運京儻敢囤積把持卽由地方官嚴拏懲辦以廣招徠而裕民食○諭戶部奏遵議廣籌賑濟一摺京師五城飯廠前經降旨展放兩月見值糧價昂貴貧民生計維艱自應加恩量爲調劑著順天府府尹於內城六門外各擇地段添設粥廠六處俾城內旗民就近領食每廠每日給粟米二石並著放至年終爲止再由該府尹察看情形辦理該府尹迅卽遴委妥員會同五城認真稽查儻有不肖官吏私易米色侵蝕虛糜卽著嚴參其五城飯廠已展放至六七兩月著再加恩添放八九兩月至十月照例開廠仍展至來年四月初五止並著五城御史督率司坊各員隨時稽查勿令胥吏舞弊以

資接濟而恤民艱○諭軍機大臣等戶部奏請飭江蘇浙江招商買米一摺本年進倉新漕爲數無幾粳米一項急應寬爲籌備江浙兩省素稱產米之區上海甯波各口又爲臺米可通之地著何桂清趙德轍晏端書查照成案招商認辦粳米二三十萬石運赴天津官爲收買其米價若干卽由該督撫秉公議定並將承辦商人姓名米數先行奏報此外應加水腳及載貨免稅均有成案可循務卽查照定章奏明辦理將此各諭令知之○戶部議覆伊犁將軍扎拉芬奏奏防剿喀什噶爾等城回匪需餉孔亟請飭陝甘總督先籌撥銀十餘萬兩並山西陝西山東等省於欠解甘餉項內各按原奏數目儘先籌解以資接濟允之○已未諭軍機大臣等寄諭伊犁將軍扎拉芬奏等前因烏爾清阿將庫車回子斬梟多名諭令扎拉芬派員前往密查茲據慶英固慶奏稱訪聞起

覺根由係烏爾清阿家丁串通回子通事濫行攤派以致釀成事端烏爾清阿任聽家丁陳泰李十與通事王素皮串通濫派差徭致回犯邁買鐵里等聚眾滋事並不秉公辦理輒將回犯斬梟三十名之多迨固慶路過庫車仍不肯將情節告知幸慶英業已派員前往訪明起覺根由若不迅速嚴辦何以服回眾之心烏爾清阿任信家丁陵虐回民糊塗已極特克慎到任尙須時日庫車辦事大臣著固慶前往署理到任後卽傳旨將烏爾清阿革職拏問解赴葉爾羌交慶英嚴訊確情從重懲處並將該家丁陳泰李十通事王素皮一併鎖拏歸案審辦其應訊之回婦二名並應行傳質之章京回犯等均著照所請辦理此案情節扎拉芬泰諒已派員訪查明確如有別項情弊著一面具奏一面知照慶英訊辦將此各諭令知之○伊犁將軍扎拉芬泰奏調赴喀什噶爾之伊犁

官兵啟程並陳征兵遠戍不若近募民勇協防得力得旨所籌俱屬妥協遣勇一頂若打仗奮勇實在出力者作何安置可查成案奏聞○賂秉章奏查江西賊眾回竄樂安王鑫攻破水東賊壘後擬回師潛襲樂安之賊忽探報廣西金田起事老賊偽禱天候胡壽階率賊數萬自甯都州來將由沙溪援吉安閏五月初十日王鑫分隊迎擊賊大敗奔逃陣斬賊首胡壽階追至瑤嶺路峻而仄羣賊蹂附而上自相蹂踐官軍槍擊矛戳紛紛下墜復窮追至馬鞍石地方計四十餘里約斃賊五千名大小賊目六七十名生擒賊六百餘名奪獲大小旗幟四千餘件長矛八千餘枝刀靶鳥槍千餘件十一日僞將軍譚姓率眾二三千屯於瑤嶺徘徊不進王鑫令所部出隊佯卻以誘之賊始下山官軍分三路疾馳而進賊不戰自潰追至五星石地方賊盡逃竄又追至嚴坊沿逃斃賊八

九百名各路團練按殺逸賊二千有奇查王鑫一軍僅三千人卒能以寡擊眾巨勦殲除實爲罕見該員忠勇性生洞曉軍務其步

伐整齊軍令明肅有古名將風可否賞加勇號以示優異之處出

自恩施奏入賞王鑫巴圖魯名號○辛酉命昇福來京以葉圭書

爲山東按察使

由濟東武泰臨道遷

○以揚州軍營出力免已革漕運總督

楊殿邦罪畱營差委○壬戌諭內閣惠親王等奏蒙古王貝勒台

吉喇嘛等呈請捐輸馬匹代奏請旨一摺蒙古王貝勒台吉喇嘛

等因軍營需用馬匹情願共捐馬六千七百匹洵屬出於至誠深

堪嘉尙所捐馬匹著卽賞收此項馬匹著察哈爾都統於七八月

間照數驗收咨報該部後再由理藩院將該王貝勒等奏請獎敘

○癸亥諭軍機大臣等福興奏籌勦饒屬賊匪兼籌廣信防務一

摺江西瑞州等處大兵雲集惟東路兵力較單撫建兩城急難收

復茲據福興奏欲剿撫建必先將饒屬賊匪殲除以固饒防庶皖鄂等處援匪無由假道等語所籌係爲嚴絕賊援起見著福興卽飭總兵李定太管帶卽由萬年樂平一路統兵進剿務將饒屬踞匪悉數殲滅毋任賊匪來往自如至該將軍於李定太進兵後著卽由貴溪弋陽移營前進以爲後路聲援福興移營以後廣信不免空虛所請飭令饒廷選就近兼顧之處著晏端書斟酌情形或將見駐常山之兵移赴玉山或分撥一隊進駐廣信以重防務而顧全局將此由五百里各諭令知之○命何俊來京以楊能格爲江蘇布政使王有齡爲江蘇按察使

由雲南糧儲道遷

○乙丑諭軍機大

臣等扎拉芬奏阿克蘇安設糧臺請派員總司其事並慶英固慶倭什琿布奏請飭陝甘撥餉各摺片阿克蘇爲南北扼要之地見在大兵進剿回匪自應安設糧臺以資轉運著卽派海模總司

辦理兒在內地軍務未竣需餉浩繁是以欠解甘餉爲數甚鉅此次回匪倉卒起事一切支發斷難照從前成案辦理著該將軍卽傳旨令海模博節動用毋許遇事鋪張事竣之後卽責成海模覈實報銷一手經理見調伊犁官兵一千五百名喀喇沙爾等處蒙古兵三千名烏嚕木齊官兵一千五百名前往會剿兵力已厚著卽嚴飭帶兵各員兼程前進迅將喀英兩城回匪痛加剿洗以期及早肅事儻有遷延觀望貽誤事機者卽著嚴參懲辦至各省應解餉銀前已諭令山西陝西山東河南共撥銀數十萬兩已據山西撥銀十萬兩解赴甘肅此外各省本日復降旨飭催諒必源源接濟該將軍大臣等於餉銀到後務須查看各路緩急情形均勻分撥將此由五百里各諭令知之○諭前因喀什噶爾等處賊匪滋事疊諭陝甘山東河南等省籌解餉需諒皆遵照辦理本日據

倭什琿布奏派兵赴喀什噶爾等處策應並撥兵往阿克蘇防堵其餉無款可籌請飭陝甘總督卽措銀十萬兩解往又據慶英等奏各路調派官兵約六月中齊集葉城彼處兵餉自顧不暇急需內地餉銀並請飭陝甘速解數萬兩等語見在回疆需餉孔亟刻難緩待樂斌諒已在甘省設法籌措先其所急惟該省庫項無存全賴各省解到方能分撥見據山西巡撫王慶雲奏到已撥銀十萬兩起解在途此外山東省應解銀二十萬兩尙未據奏撥著崇恩卽飭藩司籌款陸續趕解毋許遲延河南省前派撥二十萬兩雖見辦軍務恐一時未能湊集仍著英桂先行酌撥銀數萬兩以資接濟至陝西欠解甘餉已諭曾望顏儘先籌撥銀五萬兩解甘此外如能酌量籌款並著酌加撥解毋誤要需見在回疆兵力並非不足惟餉需久絀徵調爲難各該撫等接奉此旨務各籌款迅

速解往甘肅以便樂斌均勻轉解各城以資支放俾得剋日蕝功將此由五百里各諭令知之○諭御史王德固奏請添設總兵一招據稱河南額設總兵二員河北鎮在省西北南陽鎮在省西南其東南之歸德等處並未設有專閫大員歸德府爲東面入省門戶地無險阻接壤潁亳蕭碭曹單向爲匪徒出沒之區僅有參將一員難資鎮壓見值勦擒喫緊請添設總兵一員其毗連歸德之光州陳州府各屬營伍均歸管轄並請將歸德原設參將一員量移光州藉資策應自爲地方緊要酌量變通起見著英桂酌度地方形勢及營伍兵數多寡是否應行添設移改之處妥議具奏將此諭令知之○丙寅官文胡林翼奏皖省賊匪因年荒糧盡裹脅饑民數十萬由黃梅廣濟蘄州蘄水等處間道上竄我軍分路堵禦凡大小五十餘戰殺賊萬餘閏五月二十七日南勇各營於蘄

州之望天畤開仗獲勝竭力窮追殺賊千餘不意深入險地伏賊羣起圍鈔我軍營壘全失退至蘄水臣胡林翼甫抵黃州正值我軍敗退卽駐黃州收集潰勇補製軍械已飛調水師礮船扼守沿江並調候補道王鑫同知劉騰鴻自江西來援至李孟羣尙阻英山不能前進餉道阻梗難以接濟卽調令自羅田返攻蘄水擊賊之尾並咨行都興阿等若賊匪不遽上竄下游糧道尙通自以穩固九江小池口營壘爲是或分撥馬步相機上援務須妥爲籌畫惟楚北肅清數月又爲賊竄臣官文胡林翼調度失宜令窮寇復熾咎實難辭應請旨將臣等交部議處上諭軍機大臣等湖北爲上游扼要該逆意在必爭此次南勇敗退原因賊勢眾多所致惟該匪裹脅饑民不過烏合之眾似尙不難剿散見在胡林翼已抵黃州收集潰勇補製軍械著卽督率各路兵勇迅將上竄各匪

分兵截剿毋令蔓延該大臣等見調水師礮船扼守沿江並調王
鑫劉騰鴻由江西援剿自因賊眾兵單不敷調遣之故其李孟羣
一軍本係赴援廬州見在已抵英山正宜乘勝進剿若遽行調回
則廬州當挫敗之後困守無援必致愈形危迫所有李孟羣一軍
著毋庸調回該營兵餉已諭令福濟設法接濟矣至大隊官兵圍
攻九江小池口正在喫緊務須察看緩急酌量調撥毋得顧此失
彼致九江賊勢復張此次斬擒賊匪已至萬餘南勇退敗係因賊
勢太眾官文胡林翼自請議處之處著加恩寬免將此由六百里
諭令知之○諭官文胡林翼奏皖省賊匪傾巢竄至蘄水一摺安
徽逆匪裹脅宿太饑民數十萬由黃梅廣濟蘄州等處分路閒道
上竄楚軍分路抵禦擒斬逆匪已至盈萬無如賊勢太眾南勇失
利軍壘全失退至蘄水胡林翼前往策應業經收拾隊伍分紮黃

州湖北水陸各軍正在九江小池口圍攻喫緊之時今中路忽爲賊斷官文等已調李孟羣還攻蘄水擊賊尾路惟皖省賊氛尙熾李孟羣已抵英山若令折回恐廬州更無援應本日已諭官文等無庸將李孟羣一軍調回俾仍由英山前進節節勦洗以遏皖省賊勢但道路梗阻湖北不能接濟所有該藩司一軍餉需著福濟源源分撥毋令缺乏此次皖賊由宿太等處傾巢竄入楚境實因皖省無兵牽制致令該逆恣意上竄福濟鄭魁士坐擁重兵何得株守廬州一籌莫展見在逆匪全力注意楚疆則皖境必有可乘之隙著福濟鄭魁士迅速出兵爲擣虛攻瑕之計毋得專待李孟羣救援致成坐困之勢至安徽雖係殘破之區賊蹤徧地整頓較難然地方官若得幹練之員激勵鄉團安良除莠綏輯一方卽少一方之裒脅福濟撫皖有年於察吏安民之道並不講求安望軍

務日有起色務當振刷精神力圖補救若徒知索餉以供坐守之兵於軍務有何裨益耶將此由六百里諭令知之○丁卯諭內閣何桂清奏查明沙船被劫處所應由山東巡撫查參等語本年江浙運糧莊合順等沙船在蘇山養馬島等處被劫派管將弁不能實力巡護非尋常疏忽可比既據該督等查明石島距江蘇洋面千里而遙蘇山在石島之西養馬各島並無其名惟有養魚池在石島之東均係山東榮城縣管轄著崇恩查明該管水師將弁卽行嚴參懲辦毋稍姑容○戊辰曾國藩奏查湘勇自臣離營後赴江西投效者安謐如常吉安臨江屢獲勝仗將軍福興巡撫耆齡先後至瑞州視師犒賞各營皆歡欣踊躍樂爲用命可見士無常親惟撫馭者是親不必楚人而後能用楚眾也臣以丁憂人員未開實缺寸心終抱不安衰絰從戎明臣黃道周目爲不祥之人合

無籲懇 天恩仍准開除兵部侍郎寶缺俾得回籍終制感激鴻
慈實無既極 上諭內閣曾國藩以督兵大員正當江西喫緊之
際原不應遽請息肩惟據一再陳請情詞懇切朕素知該侍郎並
非畏難苟安之人著照所請准其先開兵部侍郎之缺暫行在籍
守制江西如有緩急卽行前赴軍營以資督率此外各路軍營設
有需才之處經朕特旨派出該侍郎不得再行瀆請致孤委任○
諭軍機大臣等德興阿等奏何桂清咨調水師船隻歸和春等調
遣並據和春將何桂清原文咨會請仍遵前旨辦理以專責成等
語德興阿和春等身膺統師重任江南北剿賊事宜應歸該大臣
等調度何桂清本非專辦軍務此次咨調泊承陞等師船歸和春
等調遣原爲速克鎮江起見既據和春咨會南北夾攻不分畛域
德興阿等卽可仍遵前旨辦理不至更形掣肘見在籌攻鎮江非

水師不能廓清江面況聞賊鋒眾多該逆恃爲障庇必得調集師船先用火攻焚毀方能直抵金山及銀蒜等山攻其水營奪獲後不獨鎮江可克卽瓜州亦在掌握中矣據德興阿奏張國樑已到鎮江和春亦卽日移師前往南岸大兵業經雲集德興阿等務當督飭各軍水陸並舉與和春等合力圖功速拔堅城待膺懋賞朕不勝盼望之至將此由六百里各諭令知之○己巳以徐樹銘爲兵部右侍郎由內閣學士遷○庚午諭內閣譚廷襄奏地方梟賊充斥請變通從嚴懲辦一摺直隸天津河間與山東毗連等屬向多鹽梟出沒數百爲羣每經商巡攔阻拒捕搶劫橫行無忌兵役追緝亦復此拏彼竄若不嚴行懲辦何以除兇暴而靖閭閻嗣後該二府與山東毗連各屬商巡隨同兵役緝匪著准其攜帶烏槍如遇大夥梟販持仗拒捕准其格殺勿論其尋常自行緝私仍照舊章辦

理至地方官查拏梟販如遇大夥匪徒數十人及百人以上橫行搶劫卽照拏辦土匪之例審明後先行就地正法其尋常並非大夥梟販及偷扒灘坨等案仍照定例辦理以示區別該督卽通飭各該州縣董率團練加派兵役無分畛域合力兜拏毋任著名梟販得以倖逃法網○辛未諭內閣海樸奏阿克蘇地方擊退賊匪請將伯克獎勵一摺阿克蘇所屬柯爾坪地方突有賊匪五百餘人直撲卡倫經該處伯克哈色木帶領回兵前往迎擊殺賊多名該匪敗回復帶兵追趕至賽林底卡倫又斃匪十餘名賊眾奔潰追殺十餘里奪獲槍矛馬匹多件五品頂翎六品伯克哈色木擊退賊匪不至蔓延尙屬奮勇可嘉著加恩賞給四品頂帶以示鼓勵○壬申予病故統帶師船蘇松鎮總兵葉常春定海鎮總兵周士法照軍營病故例優卹○癸酉諭內閣譚廷襄奏遵旨招商運

糧赴京懇恩免稅一摺見在譚廷襄遴派道員赴近京一帶招商販運米糧由天津通州轉運來京接濟民食所有該商等沿途經過地方著准其免稅以廣招徠仍著譚廷襄嚴查各屬如有州縣遏糴及商賈把持等弊卽行嚴參懲辦○諭王懿德奏官軍克復泰甯縣城一摺閏五月二十一等日福建提督鍾寶三統帶兵勇進攻泰甯縣賊匪該逆膽敢出撲我軍槍礮齊施斃賊一百七十餘名生擒張得仔等十一名正法餘匪尙敢抗拒鍾寶三督率各軍長驅直進卽於二十二日將泰甯縣城收復此次鍾寶三親督各軍進剿辦理尙爲迅速著卽乘勝進攻並將建甯縣城克復所有在事出力員弁著該督查明保奏候朕施恩○烏勒洪額文謙錢忻和奏俄人到津聲稱有知照理藩院公文來津投遞並就近等候覆信業經派員相機開導該國堅欲投文不肯說明來意奏

入命文謙親往俄船曉諭○直隸永定河溢○甲戌諭內閣王懿德奏官軍克復建甯縣城一摺閏五月二十六等日福建提督鍾寶三統帶官兵進攻建甯縣賊匪該逆紛撲抗拒守備陳韶舞手刃執旗賊目一名把總汪士忠矛刺悍賊數名各軍槍礮齊施殲逆匪數十名該逆紛紛退逃自相踐踏餘匪奔竄入城兵勇奮力圍攻轟斃城上賊匪多名大軍繼進斃賊一百餘名生擒李長奎等八名正法奪獲大礮火藥器械甚多當將縣城收復餘匪由北門竄逃經聯甲壯丁窮追斬馘不計其數參將林策勳等分路搜捕均有斬擒見在邵武府屬各縣均已一律肅清勦辦尙爲迅速著鍾寶三乘此聲威會攻甯化縣城剋期收復盡殲醜類毋畱餘孽其在事出力員弁兵勇著該督查明彙案保奏○乙亥諭內閣昨據御史毛昶熙奏參步軍統領聯順徇私廢法各款當令左

都御史肅順面傳諭旨令將所參劣蹟據實詳奏本日復據該御史奏稱已革筆帖式慶陽係聯順親戚今在步軍統領衙門影射辦事攬權納賄廣置房產上年作壽演戲五營將備齊往慶賀營汎爲之一空其爲聯順腹心縱容舞弊已有實據著派端華偕格林沁卽將慶陽拏獲會同刑部審訊慶陽家產並著端華等嚴密查封至所參聯順得受營規堆撥兵役每多缺額等款著一併查明具奏聯順著先開步軍統領缺聽候查辦○諭恆春桑春榮奏回匪竄至省垣見籌勦辦情形自請嚴議一摺曲江回匪勾結潑江等處回夷竄至省垣城外肆行焚殺該督撫身膺疆寄未能先事豫防咎有應得除恆春業經身故加恩寬免外雲南巡撫桑春榮及在省司道等均著交部嚴加議處○諭舒興阿桑春榮奏督臣憤急自盡一摺覽奏殊堪駭異雲貴總督恆春數歷中外平日

辦理尙屬認真見因回匪逼近省城雖事處危急而城池並未失陷該督自應力籌堵剿乃甫經具摺自請嚴議旋於六月初一日夜與其妻博禹特氏在署自縊封疆大吏當時事艱難之際不思力圖挽救輒以一死卸責不惟無益國事抑且貽誤大局死出無名與效命疆場者不可同日而語惟覽其遺摺因堵截計窮自怨誤國殃民一死不足蔽辜且惓惓以國計民生爲念無一語涉及家事其情亦甚可憫所有該督自請嚴議之處著加恩寬免仍無庸給予卹典以昭平允○諭黃琮等奏辦理團練無效請交部嚴加議處一摺前任兵部侍郎黃琮江西道監察御史竇垕廣西左江鎮總兵周鳳岐辦理團練因回匪猝至未能抵禦致撲省城均屬咎有應得惟該員等俱係紳士與地方官究屬有間黃琮竇垕周鳳岐均著加恩改爲交部議處○諭軍機大臣等本日據恆春

桑春榮奏曲江回匪句結回夷竄及省垣請飭撥兵餉復據舒興阿桑春榮奏督臣恆春事急自盡聞之不勝駭異雲貴總督一缺見辦軍務甚爲緊要已降旨著吳振械調補卽赴新任毋庸來京請訓矣川省接壤滇疆見在大理尙未克復全滇官兵一半外調臨安府屬曲江回匪復句結潞江等處回夷潛至呈貢縣糾聚數千人衝散團練偏及省城見在桑春榮等籌畫守禦兵餉均缺吳振械著再於川省挑撥精兵二千名親自督帶赴滇並在川籌撥餉銀五萬兩迅速委解爲接濟軍需之用毋得遲延致誤四川總督印務卽交藩司祥奎護理雲南回匪滋事已閱年餘其始由地方官區分漢回之見不能秉公剖辦及至勢成燎原復未能分別良莠勦撫兼施以致回匪潛蓄異志常謂漢人欺回日事報復此次恆春等呈遞該回僞示歸咎於劣紳欺陵大吏偏袒覽其措詞

尙未敢公然背叛吳振械於雲南情形頗能熟悉經朕委以艱鉅
重任務卽先行出示剴切曉諭但分良莠不分漢回俾先聲奪人
解散黨與到滇後恩威並用示以通權達變之方不爲浮言所惑
方能帖服人心挽回大局該督閱歷已深辦事素有把握此中操
縱機宜著卽悉心籌辦該回僞示並著發給閱看再新授湖南臬
司徐之銘籍隸貴州於滇省回務情形尙爲熟悉茲已調任雲南
臬司俾該督得收指臂之助將此由六百里諭令知之○諭曲江
回匪勾結潞江回夷至省垣焚殺狂悖已極惟據恆春將該回民
僞示咨送軍機處朕覽其詞意尙未敢自居於叛逆總以漢匪叛
逆有據爲詞可見前次辦理總未得其平以致回民有所藉口桑
春榮已補授巡撫本日復調吳振械爲雲貴總督並諭令由四川
帶兵二千名餉銀五萬兩馳往滇省相機辦理未到任以前雲貴

總督印務著桑春榮暫行兼署恆春所調各兵諒已到省務當督飭文武各員實力堵剿毋稍疏懈漢回皆係滇省百姓辦理之法但須分別良莠不可歧視漢回務將此意剴切曉諭俾知官兵剿辦毫無偏袒庶幾知感知悔可以解散其黨吳振械到任後該撫卽會同籌辦軍務毋庸來京請訓將此由六百里諭令知之○調吳振械爲雲貴總督以王慶雲爲四川總督恆福爲山西巡撫常績爲山西布政使由大理寺卿遷○調徐之銘爲雲南按察使毓科爲湖南按察使○予貴州死事訓導黃錕等祭葬世職○丙子諭內閣端華僧格林沁奏遵旨查封慶陽家產查有私存稟案各件有乖體制等語向例各衙門稟案均應收存官所何以已革筆帖式慶陽寓所存有步軍統領衙門稟案及各項報單著聯順明白回奏○諭耆齡奏官軍克復龍泉縣城敗匪殲除淨盡一摺五月二十

七等日已革副將周鳳山督兵環攻龍泉縣城屢有斬擒閏五月二十五日渡濠環擊投誠賊目內應各勇緣梯登城逆匪猶拌死巷戰兵勇分投兜殺其殲斃三千餘人奪獲軍械一千餘件當將縣城克復在事出力人員著該撫查明擇尤保奏○諭耆齡奏進剿永豐各股匪徒疊次獲勝一摺候補道王鑫帶兵馳抵永豐在沙溪等處追殺竄匪生擒賊首前據駱秉章奏報已降旨分別獎卹茲復據耆齡奏稱五月二十一日王鑫由沙溪追賊至韶源地方焚毀賊營通計斃賊二千餘名生擒數百名其吉安賊匪屢次出撲均經知府趙煥聯等擊敗萬安敗匪亦經水師截擊殲斃無算此次在事出力各員著耆齡擇尤請獎○諭軍機大臣等曾國藩援剿江西之師多係楚勇素稱得力茲據給事中李鶴年奏該勇自曾國藩回籍後漸忘紀律頗有滋擾情事此項楚勇見歸何

人管帶著福興耆齡查明如有滋擾情形卽飭帶兵之員妥爲約束無令滋事前據官文奏安徽逆匪分股上竄南勇失利已檄調王鑫一軍回楚應援但王鑫見在吉安剿匪頗屬得力如令赴楚何人可以接管或因吉安正當喫緊卽將王鑫暫畱江西俟克復吉安再令前往湖北著福興耆齡斟酌辦理至福興前奏派李定太帶兵由萬年樂平一路進剿饒屬踞匪該將軍卽由貴溪弋陽前進以爲後路聲援見在福建連克城池撫建賊勢稍衰福興正可督兵節節進剿如能會合閩兵不難痛殲醜類規復撫建二城著福興體察情形相機辦理毋得遷延貽誤將此由五百里諭令知之○戊寅諭內閣和春奏圍攻鎮江逆匪獲勝一摺自溧水句容相繼克復後經和春等督飭各軍移營規復鎮江府城張國樑率同虎嵩林等連日紮營逼進六月十一日銀臺山賊疊出七八

千人分路撲來都司周顯親等迎擊斃賊數十該逆恃眾抗拒張國樑率領副將李若珠等接戰復斃多名張國樑揮令李若珠等左右夾攻周天培馮子材等從後鈔擊斃賊不計其數並擊倒黃衣悍賊數名乘勝追擊該逆猶敢紮駐山梁槍礮回抗我軍冒煙搶上斃賊甚眾餘皆敗逃甘露寺金山等處復出賊千餘來援余萬清虎嵩林等督兵分途截剿總兵泊承陞等亦督水軍攻打甘露寺賊營逆勢大敗狂奔官軍追殺至城西門該逆滾厓落澗死者不計其數統計是日斃賊六七百名砍取首級五十餘顆奪獲旗幟軍械二百餘件逆匪踞守鎮江死力抗拒我軍旣已移營進剿獲勝著和春張國樑速卽乘機力圖克復並飭南北岸水路各軍併力攻取毋稍延玩○和春何桂清奏遵查德興阿在江北紮營均在蔣王廟一帶距瓜州賊營三十餘里每遇出隊甫近賊營

兵力已疲不過開放槍礮未能竭力攻擊逆匪伏巢不出往往未經接仗旋即收隊所報獲勝情形遂有未能盡實之處採聽輿論似非無因臣等復加訪察該大臣從前打仗尙屬奮勇惟近年親身督剿之時甚少外間有患病沉重行動維艱之語臣和春上年秋閒至江南時繞過蔣王廟曾經接見步履一切如常並無病情至侍衛蘊秀言論尙屬明白似無乖謬情形惟與德興阿不甚浹洽雖無把持情事但與軍營究屬未宜可否飭令回京供職上諭軍機大臣等據和春何桂清奏侍衛蘊秀帶兵不能得力等語蘊秀在揚州軍營曾經德興阿等保奏賞給副都統銜該侍衛帶兵打仗究竟能否奮勇著德興阿翁同書秉公確查如果該侍衛在營不能得力卽據實具奏再降諭旨○命三品頂帶已革江蘇巡撫許乃釗赴欽差大臣和春軍營幫辦軍務○賞已革山東巡

撫張亮基五品頂帶幫辦雲南勦匪事宜○命潘楷來京以福連
爲貴州按察使由兩淮鹽運使遷○是月減江蘇橫浦等六場被災竈課
十分之三